

Headlines

- 1 उधमपुर जम्मू लोकसभा सीट लेई प्रचार तेज, प्रधानमंत्री नरेंद्र मोदी होर कल बीजेपी दे समर्थन च इक चुनावी रैली गी संबोधित करडन।
- 2 प्रधानमंत्री नरेंद्र मोदी होरें उत्तराखंड च इक चुनावी रैली दौरान गलाया जे केंद्र च एनडीए सरकार नै पिच्छले 10 बरें दौरान देश गी होर मता मजबूत बनाया ऐ।
- 3 पुलवामा च इक टाकरे च सुरक्षाबलें 1 आतंकी गी मारी मकाया ते सुरक्षाबलें दी जानकारी आतंकवादियें तगर पजाने दे आरोप च 3 आतंकी सहयोगिणें गी गिरफ्तार कीता ऐ।
- 4 मौसम विभाग नै अगले 48 घंटे दौरान जम्मू-कश्मीर च हल्की थमां दरम्याने दर्जे दी बरखा पौने दी पेशनगोड़ कीती ऐ।

<><><><><><>

Campaign-JK

लोकसभा चुनावें दे पैहले ते दुए गेठ लेई प्रचार तेज होई गोआ ऐ। बक्ख-बक्ख सियासी पार्टियें दे वरिष्ठ लीडर लोकें गी अपनी पार्टी दे मेदवार दे हक च वोट पाने लेई देश दे बक्ख-बक्ख हिस्से च रैलियां ते रोड शो करा'रदे न। पैहले गेठ लेई वोट 19 अप्रैल गी, दुए गेठ लेई वोट 26 अप्रैल गी पोआए जाडन। जम्मू-कश्मीर दी उधमपुर ते जम्मू सीट लेई बी इनें गेठें च गै वोट पोआए जाडन। प्रधानमंत्री ते बीजेपी दे सीनियर लीडर नरेंद्र मोदी होर कल उधमपुर च इक चुनावी रैली गी संबोधित करडन। इस रैली राएं ओहू लोकें गी उधमपुर ते जम्मू सीट थमां बीजेपी दे मेदवार डॉ. जतिंद्र सिंह ते जुगल किशोर शर्मा हुंदे हक्क च वोट पाने लेई हिमायत करडन। इयां गै कांग्रेस दी सीनियर लीडर प्रियंका गांधी ते सचिन पायलट होर बी 13 ते 16 अप्रैल गी पार्टी दे मेदवार चौधरी लाल सिंह ते रमन भल्ला हुंदे समर्थन च उधमपुर ते जम्मू च चुनावी रैलियें गी संबोधित करडन। साबका मुख्मन्त्री उमर अब्दुल्ला होरें बी इंडी गठबंधन दे समर्थन च चौधरी लाल सिंह हुंदी हिमायत च डोडा च 14 अप्रैल गी जनसभाएं गी संबोधित करने दी योजना बनाई दी ऐ।

<><><><><><>

PM-Uttarakhand Rally

प्रधानमंत्री ते बीजेपी दे सीनियर लीडर नरेंद्र मोदी होरें गलाया ऐ जे केंद्र च एनडीए दी सरकार नै पिच्छले 10 बरें दौरान देश गी होर मता मजबूत बनाया ऐ। रिशिकेश च इक चुनावी रैली गी संबोधित करदे होई मोदी होरें गलाया जे जदूं बी देश च कमजोर ते अस्थिर सरकार आई ऐ, अदूं गै दुश्मनें एहदा फैयदा चुक्केया ऐ ते आतंकवाद नै अपनियां जडां फैलाइयां न। प्रधानमंत्री होरें गलाया जे उंदी सरकार नै जवानें लेई इक्क रैंक-इक्क पेंशन स्कीम शुरू कीती। उनें गलाया जे बीजेपी सरकार नै देश दे बन्ने कन्नै लगदे ग्राएं गी होर मता विकसित कीता ऐ। तोआई, प्रधानमंत्री नरेंद्र मोदी होरें भारत चीन सीमा स्थिति उप्पर तत्काल ध्यान देने दी जरूरत उप्पर बल दिता ऐ तां जे आपसी सरबंधें च असमानताएं गी दूर कीता जाई सकै। उनें गलाया जे भारत ते चीन बश्कार स्थिर ते शांतिपूर्ण सरबंध धड़े दवैं मुल्लें गै नेई सगुआं पूरे क्षेत्र ते पूरी दुनिया लेई बी महत्वपूर्ण न। अमरीकी जरोदा गी दित्ते गोदे इक्क इंटरव्यू च प्रधानमंत्री होरें एहू मेद बुज्जी जे राजनयिक ते सैन्य स्तरें उप्पर सकारात्मक ते रचनात्मक दपक्खी मेल जोल दे राएं दवैं मुख्मन्त्री उप्पर शांति ते स्थिरता बहाल करने ते बनाई रखने च सक्षम बनी सकडन। भारतीय लोकतंत्र उप्पर गल्ल करदे होई प्रधानमंत्री होरें गलाया जे देश च मतदाताएं दी लगातार बधा रदी शमूलियत लोकतंत्र दे प्रति लोकें दे विश्वास दा बड्डा सबूत ऐ।

<><><><><><>

Rajasthan-Rahul

कांग्रेस दे साबका प्रधान राहुल गांधी होरें अज्ज राजस्थान दे अनूपगढ़ च इक जनसभा गी संबोधित कीता। इस दौरान उनें गलाया जे अज्ज मुख्मन्त्री च दो बड्डे मसले न, बेरोजगारी ते बधा'रदी महंगाई, पर एहदे अलावा होर दुए मसलें गी प्राथमिकता

दित्ती जा'रदी ऐ। गांधी होरें गलाया जे देश च गरीबें, पिच्छडे वर्गें, जनजातियें, दलितें ते अल्पसंख्यकें दी आबादी 90 फीसदी शां बद्द ऐ। हालांकि देश दी 200 बड्डी कंपनियें दे मालक ते वरिष्ठ प्रबंधन पिच्छडे वर्ग कन्नै सरबंधत नेई ऐ। उनें गलाया जे देश च 30 लक्ख सरकारी असामियां खाली पेदियां न ते जेकर कांग्रेस इस बारी सत्ता च आँदी ऐ तां उंदी सरकार 30 लक्ख लोकें गी सरकारी नौकरियां दित्तियां जाडन ते सरकारी विभागें ते पी.एस.यू च, कांट्रैक्चुअल सिस्टम उप्पर बंदश लाई दित्ती जाग। अग्निवीर स्कीम दी नुक्ताचीनी करदे होई राहुल गांधी होरें गलाया जेकर कांग्रेस पार्टी सत्ता च आई तां इस स्कीम गी बी खत्म करी दित्ता जाग। देश च जाति दे आधार उप्पर मर्दमशुमारी दी हिमायत करदे होई उनें गलाया जे एह पता लाना जरूरी ऐ जे भारत दी किन्नी संपत्ति, कोहदे हत्था च ऐ। उनें गलाया जे देश दी मती पूंजी किश चुनिंदा पूंजीपतियें दे कोल ऐ ते इस फर्कोफर्की गी खत्म करना लोडचदा ऐ।

<><><><><><>

Notification-J&K

लोकसभा चुनांड दे त्रीये गेढ लेई अधिसूचना कल जारी कीती जाग। राजौरी अनंतनाग सीट लेई वोट इस्सै गेढ तैहत पोआए जाडन। अजे तगर बीजेपी गी छोडिये होर दुइए सियासी पार्टियें इस सीट लेई अपने मेदवारें दा ऐलान करी दित्ते दा ऐ। नेशनल कांफ्रेंस दी तरफां मेदवार साबका मंत्री ते जनजातीय लीडर मियां अल्ताफ, पीडीपी थमां महबूबा मुफ्ति, साबका मुख्मन्त्री गुलाम नबी आजाद होर डेमोक्रेटिक प्रोग्रेसिव आजाद पार्टी थमां ते अपनी पार्टी थमां जफर इकवाल मन्हास होर चुनांड मैदान च खडोते दे न। इस गेढ तैहत 19 अप्रैल गी नामांकन पर्चे दाखल कीते जाडन ते 7 मई गी वोट पोआए जाडन।

<><><><><><>

Haryana

अज्ज हरियाणा दे महेंद्रग जिले च पेश आए दे इक शिडक हादसे च स्कूल बस दे पलटोई जाने करी ओहदे च सोआर 8 बच्चें दी मौत होई गई ते केई जनें घायल होई गये। एह दुर्घटना उनहनी ग्रांड दे नेडे पेश आई। पुलस नै दस्सेआ ऐ जे बस दे डरैवर गी गिरफ्तार करी लैता गेआ ऐ। हरियाणा दियां शिक्षा मंत्री सीमा त्रिक्खा होरें महेंद्रगढ अस्पताल दा दौरा लाया जित्थे 12 घायल बच्चें दा इलाज चला'रदा ऐ।

<><><><><><>

Terrorist

जम्मू-कश्मीर दे पुलवामा जिले च सुरक्षाबलें कन्नै होए दे इक टाकरे च अज्ज इक्क आतंकवादी मारेआ गेआ। सुरक्षाबलें दे प्रवक्ता मुताबक इक्क टकोहदी सूह थ्होने मगरा दक्खण कश्मीर दे पुलवामा जिले दे राजपोरा इलाके दे फसीपोरा ग्रांड च घेरा पाइयै तलाशी आहली कार्रवाई कीती गई। आतंकवादिएं आस्सेआ सुरक्षाबलें पर गोलियां चलाई देने मरगा एह तपाशी अभियान टाकरे च बदली गेआ। इस टाकरे च इक्क आतंकवादी मारेआ गेआ। पुलस नै आखेआ जे मारे गेदे आतंकवादी दे संगठन ते ओदी शिनाखत कीती जा करदी ऐ।

<><><><><><>

Terror-Module Baramula

सुरक्षाबलें बारामुला जिले च इक्क आतंकी मांडयूल दा भंडाफोड कीता ते लश्कर-ए-तैयबा दे त्रऊं सहयोगियें गी गिरफ्तार करी लैता। उंदे कोला किश ऐतराज जोग समयान ते हथियार बी बरामद कीते गे। पुलस नै इस मामले च गिरफ्तार कीते गेदे आवैस अहमद वजा ते बासित फैयाज कालू दे तौर पर इंदी पंछान कीती ऐ। एह दवै बारामुला दे गनी हमाम दे रौहने आहले हे। गिरफ्तार कीता गेदा त्रिया शख्स बारामुला दे मीर साहब ओलड टाउन दा रौहने आहला हा। पुलस नै दावा कीता ऐ जे एह त्रैवें जनें अपने आकाएं गी सुरक्षाबलें दी गतिविधियें बारै जानकारी दिंदे हे। इंदा इरादा लोकसभा चुनाएं कोला पैहलें बारामुला च अमन शांति गी भंग करने दा हा।

<><><><><><>

Elder Voters Samba

सांबा जिले दे राया ग्रांड दे रौहने आहले 100 बरे दे बरेसू आहले रत्न चंद शर्मा ते 95 बरे दी बरेसू आहली उंदी घरा आहली सोमा देवी होर इस गल्ला गी लेइयै बडे खुश न जे इस बारी ओह लोकसभा चुनाएं च अपने घरा सवां वोट पाडन। रत्न चंद

शर्मा जेडे फौज सवां रिटायर होए देन, आखेआ जे पैहले बुजुर्ग लोकें गी वोट पाने दे बेल्लै बड़ी मुश्कल दा सामना करना पौंदा हा, उयां इस लोकसभा चुनाएं च बुजुर्ग लोक अपने घरें सवां वोट पाडन।

<><><><><><>

Senior-Citizens Kathua

कठुआ जिले दे 85एं बरें सवां मती बरेसू दे वरिष्ठ नागरिक नै अपने घरा सवां वोट पाने दा मौका हासिल होने पर भारतीय चुनाव कमीशन दा धन्नवाद कीता ऐ। उनें आखेआ जे इस पैहलकदमी कन्नै मतदान प्रतिशत च बादा हाग ते इस बरे दी बरेसू दे मतदाताएं गी दूरदर्शी सरकार चुनने दा इक्क खरा मौका हासल होग। इक्क वरिष्ठ नागरिक पिन्ध्यनी आए दे प्रोफेसर राममूर्ति होरें आखेआ जे इयां पैहली बारी होआ ऐ जे भारती चुनाव कमीशन नै मतदान प्रतिशत च बादा करने बारै गहराई कन्नै सोचेआ ऐ ते 85एं बरें सवां मती बरेसू दे वरिष्ठ नागरिकें, दिव्यांग लोकें ते मता कसरी होई गेदे लोकें गी अपने घरें सवां मतदान करने दी सहूलत उपलब्ध कराई ऐ।

<><><><><><>

Head Suspended

जम्मू-कश्मीर दे रामबन जिले च आदर्श आचार संहिता दी खलाफवर्जी करने करी ग्रांड दे इक लंबडदार गी मुअत्तल करी दित्ता गेआ ऐ। जिला चुनाव अधिकारी आस्सेआ जारी इक्क आदेश मुताबक कुनफर दे इक्क लंबडदार गी 7 अप्रैल गी इक राजनीतिक रैली च हिस्सा लैने करी मुअत्तल करी दित्ता गेआ ऐ।

<><><><><><>

Reti-Poonch

ग्राएं-पिडें दे इलाके च रोजगार देने दे मकसद कन्नै पुंछ जिले च जेके बैंक रूरल सेल्फ इम्प्लायमेंट ट्रेनिंग संस्थान नै कृषि विज्ञान केंद्र पुंछ दे सहयोग कन्नै 35एं महिलाएं गी कपडे सीने दे कम्मै दी इक्क म्हीने दी सिखलाई देने आह्ला प्रोग्राम लोआया।

<><><><><><>

MET-J&K

मौसम सरबन्धी केंद्र श्रीनगर नै अगले 48एं घैंटें दौरान जम्मू-कश्मीर दे केई इलाकें च हल्की सवां दरम्यानी बरखा पौने दी पेशनगोई कीती ऐ। मौसम सरबन्धी दफतर नै आखेआ ऐ जे 12 अप्रैल गी टामियें-टामियें थाहें हल्की बरखा ते 13 अप्रैल गी हल्की सवां दरम्यानी बरखा होने दा अनुमान ऐ। 14 अप्रैल गी कई थारें पर गरजिये फंडां पौने, बिजली चमकने, ऐन गडे पौने ते आंधी चलने दी शंका ऐ। उच्च थारें पर हल्की कोला दरम्यानी बर्फवारी बी होने दी पेशनगोई कीती गेई ऐ।

<><><><><><>